

Во ПОНЕДЕЛЬНИК 7-Й СЕДМИЦЫ ПО ПАСХЕ

В НЕДЕЛЮ ВЕЧЕРА

На Господи воззвах: поставим стихов 6

И поем стихиры святых отец, 3, глас 6-й:

Подобен: Отчаянная:

Из чрева родился еси прежде денницы, от Отца безматерен прежде век: аще и Арий тварь Тя, а не Бога славит, дерзостию смешая Тя Зиждителя тварем безумно, вещество огня вечнаго себе сокровиществуай. Но Собор, иже в Никеи, Сына Божия Тя проповеда Господи, Отцу и Духу Сопрестольна.

Кто Твою Спасе ризу раздра? Арий, Ты рекл еси, иже Троицы пресече Единочестное Начало в разделения: сей отверже Тя быти Единаго от Троицы, сей и Нестория учит Богородицу не глаголати. Но Собор, иже в Никеи Сына Божия Тя проповеда Господи, Отцу и Духу Сопрестольна.

В брег падает греха, Арий возненавидевый света видети, и божественною растерзается удищею внутренних, все издати существо и душу нужно, другой Иуда быв нравом и образом. Но Собор, иже в Никеи, Сына Божия Тя проповеда Господи, Отцу и Духу Сопрестольна.

И Миней святого, 3.

Слава: глас 6-й:

Таинственные днесь Духа трубы, богоносныя отцы восхвалим песнопевшыя посреде Церкви, песнь сличную богословия, Троицу Едину неизменную, Существо же и Божество: низложители Ариевы, и православных поборники, молящися всегда Господу, помиловатися душам нашим.

И ныне, глас тойже:

На горах святых зряще Твое Вознесение Христе, Сияние славы Отчи, поем Твой светообразный лица зрак, кланяемся Страстем Твоим, почитаем Воскресение, славное Вознесение славяще, помилуй нас.

На стиховне стихиры, глас 6-й:

Все собравше душевное художество, и Божественным Духом сразсмотривше, небесный и честный Символ веры, честнии отцы богописание начерташа: в немже явственнейше Рождшему Собоизначальнаго Слова научают, и всеистинно Единосущнаго, апостольским последующе проявленно учением, благославнии и пребогатии истинно, и богомудрии.

Стих: Благословен еси Господи Боже отец наших: и хваально и прославлено имя Твое во веки.

Все собравше пастырское искусство, и ярость подвигов ныне праведнейшую, отмстительне тяжкия отгнаша и пагубныя волки, пращею Духа

извергше от церковнаго исполнения, падшыя яко к смерти, и яко неисцельно недуговавшия божественнии пастырие, и яко раби истиннейшии Христовы, и Божественнаго проповедания таинницы священнейшии.

Стих: Соберите Ему преподобныя Его, завещающыя завет Его о жертвах.

Все собравше душевное художество, и Божественным Духом сразсмотривше, небесный и честный Символ веры, честнии отцы богописанне начерташа: в немже явственнейше Рождшему Собезначальнаго Слова научают, и всеистинно Единосущнаго, апостольским последующе проявленно учением, благославнии и пребогатии истинно, и богомудрии.

Слава, глас 3-й:

Апостольских преданий известнии хранителие бысте святии отцы: Святыя бо Троицы Единосущное православно научивше, Ариево хуление соборне низложисте, с ним же и Македониа духоборца обличивше, осудисте Нестория, Евтихиа и Диоскора, Савеллиа же и Севира безглавнаго: ихже прелести испросите избавитися нам, и нескверну нашему житию в вере сохранитися, молимся.

И ныне: глас 6-й:

Взыде Бог в воскликновении, Господь во гласе трубне, еже вознести падший образ Адамов, и послати Духа Утешителя, еже освятити души наша.

Ныне отпущаеши: Трисвятое. По Отче наш.

Отпустительный тропарь, глас 8:

Препрославлен еси Христе Боже наш, светила на земли отцы наши основавый, и теми ко истинней вере вся ны наставивый: Многоблагоутробне, слава Тебе.

Слава: святаго, аще есть: аще ли ни,

Слава, и ныне: праздника, глас 4:

Вознеслся еси во славе Христе Боже наш, радость сотворивый учеником, обетованием Святаго Духа, извещенным им бывшим благословением: яко Ты еси Сын Божий Избавитель мира.

И отдается последование святых отец.

Во ПОНЕДЕЛЬНИК 7-й СЕДМИЦЫ ПО ПАСХЕ НА УТРЕНИ

На Бог Господь: тропарь праздника, глас 4-й:

Вознеслся еси во славе Христе Боже наш, * радость сотворивый учеником * обетованием Святаго Духа, * извещенным им бывшим благословением, * яко Ты еси Сын Божий, Избавитель мира. [Дважды.]

[Слава: святого, аще имать. И ныне: празднику]

По 1-м стихословии седален, глас 1.

Подобен: Камени запечатану:

Ангелом дивящимся восхода странному, и учеником ужасающимся страшному взятия, возшел еси со славою яко Бог, и врата тебе взяшася Спасе. Сего ради силы небесныя дивляхуся, вопиюще: слава низхождению Твоему Спасе, слава царствию Твоему, слава вознесению твоему, Едине Человеколюбче

Слава, и ныне: тойже.

По 2-м стихословии, седален. Подобен: тойже:

Аду пленившуся от Тебе Животодавче, и миру просветившуся во Твоем Воскресении, возшел еси со славою Спасе, вся обдержай рукою. Сего ради со ангелы славословим Тя, Вседержителю Господи: слава вознесению Твоему, Христе, слава царствию Твоему, слава благоутробию Твоему, Едине Человеколюбче.

Слава, и ныне: тойже.

Псалом 50. Канон праздника, 4-го гласа, со ирмосы на 8, и минеи на 4. Кондак, и ексапостиларий праздника.

Песнь 1. глас 4-й:

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуясь, Тоя чудеса.

Воскресл еси тридневен, по естеству безсмертный, и явился еси единонадесятым, и всем учеником, и востекл еси Христе ко Отцу, облаком носимь всех Творче.

Вопиет явственно поя Давид богодохновенный, взыде Господь к небесным, в воскликновении и трубы шуме, и к началосветному Отцу доспе.

Состаревшийся, Господи, мир многими грехми, обновив страстию Твоею и востанием Твоим, возшел еси носимь облаком к пренебесным: слава славе Твоей.

Богородичен: Владыку родила еси всех, всенепорочная Владычице, страсть вольную приимшаго, и возшедша к Своему Отцу, Егоже не остави, аще и плоть взят.

И минеи на 4.

Katavasia: Спасителю Богу ...,

Песнь 3.

Ирмос: Твоя песнословцы, Богородице, * Живый и Независтный Источниче, * лик себе совокупльшия, духовно утверди, * в Божественней Твоей славе * венцев славы сподоби.

Возмите врата небесная, се прииде Христос Царь твари, в тело оболкся земное, горнейшим глаголаху силам дольнейшыя.

Выскав Христе, прельщеннаго прелестию змиевою Адама, яко в сего оболкийся, возшел еси, и сел еси одесную, яко сопрестолен Отцу, поющим ангелом Тебе.

Земля празднует и ликует, радуется и небо, Вознесением днесь Творца твари, предъявленно соединившаго разстоящаяся хотением.

Богородичен: Смерти родивши Разрушителя, Единого безсмертного Бога, Дево Мати Всечистая: Того присно умоли, умерщвляющыя моя страсти уморити, и спасти мя.

И минеи на 4.

Katavasia: Силою Креста Твоего Христе ...,

Кондак святого минеи, и икос, и седален его.

Слава, и ныне: Седален, глас 8-й:

Подобен: Премудрости:

Всед на облаки небесныя, оставив мир сущым на земли, возшел и сел еси одесную Отца, яко Единосущен Сему сый и Духу. Аще бо и во плоти явился еси, но непреложен пребыл еси: темже чаеши совершения конец, судити грядый на землю миру всему. Правосуде Господи, пощади души наша, прегрешений оставление даруя, яко Бог милостив, рабом Твоим.

Песнь 4.

Ирмос: Седяй в Славе * на Престоле Божества * во облаце легце, * прииди Иисус Пребожественный, * Нетленною Дланию * и спасе зовущия: * слава, Христе, силе Твоей.

Иисус Жизнодавец приим, ихже возлюбил, на Елеонскую гору восходит, и сих благослови, и облаком носимь Отчая недра доспе, яже никакоже бе оставил.

Мир весь празднует видимый и невидимый: в радости ангели ликуют и человецы, славословяще непрестанно Вознесение, плотию Соединившагося нам благостию.

Разрушивший державу смерти яко безсмертный Господи, безсмертие всем даровал еси Человеколюбче, и Вознеслся еси во славе, зрящим Тя честным учеником Иисусе всесильне.

Богородичен: Блаженно чрево Твое Всенепорочная бысть: чрево бо адово преславно истощившаго, несказанно вместити сподобилася еси: Егоже моли спасти нас поющих Тя.

И минеи на 4.

Katavasia: Услышах слух силы Креста ...,

Песнь 5.

Ирмос: Ужасошася всяческая * о Божественной славе Твоей: * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Умртвив смерть Твоею смертию Господи, взем ихже возлюбил еси, возшел еси на Масличную гору святую, и оттуду востекл еси Христе к Твоему Родителю, облаком носимъ.

Странно Твое рождество, странно Твое воскресение, странно и страшно Твое Жизнодавче, еже от горы Божественное Вознесение, еже изобразуя Илия четвероконный восхождаше, воспевая Тя Человеколюбче.

Зрящим апостолом вещаху ангели: мужие галилейстии, что чудитесь Вознесению Жизнодавца Христа: Сей придет паки на землю судити миру всему, яко Судия праведнейший.

Богородичен: Деву сохранив Тя по рождестве нетленну, восходит Христос ко Отцу, Богородительнице, Егоже не остави, аще и плоть прият из Тебе, мысленную же и одушевленную, за милость неизреченную.

И минеи на 4.

Katavasia: Утренююще вопием Ти ...,

Песнь 6.

Ирмос: Божественное сие и всечестное * совершающе празднество, * Богомудрии, Богоматере, * приидите, руками восплешим, * от Нея рождагося Бога славим.

Да каплют нам свыше облацы веселие вечное, Христос бо, облаком яко херувимы носимый, к Своему Отцу восходит днесь.

Плоти явився подобием, прежде разстоящаяся собрал еси во едино Человеколюбче, и Вознеслся еси Щедре в небесная, зрящим Тя учеником Твоим.

Что червлены ризы плоти соединившагося дебелству? Святии ангели Христа зряще вещаху, страсти честныя Божественныя носяща образы.

Богородичен: Поем Отроковице зачатие, поем Твое неизреченное рождество, имже избавихомся Чистая тли и озлобления, и мрачнаго адова затворения.

И минеи на 4.

Katavasia: **О**быде мя бездна ...,

Кондак самогласен, глас 6-й:

Еже о нас исполнив смотрение, и яже на земли соединив Небесным, Вознеслся еси во славе Христе Боже наш, никакоже отлучаяся, но пребывая неотступный, и вопия любящим Тя: Аз есмь с вами, и никтоже на вы.

Икос: **Я**же земли на земли оставившии, яже пепельная персти уступающии, приидите воспрянем, и на высоту возведем очи и мысли, вперим виды, вкупе чувства, на небесная врата смертнии, неощущим быти в Масличной горе, и взирати на Избавляющаго на облацех носима. Отонуду бо Господь на небеса востече, и тамо даролюбезны дары раздая апостолом Своим, утешив я яко Отец, и утвердив я, наставив яко сынов, и рече к ним: не разлучаюся вас, Аз есмь с вами, и никтоже на вы.

Песнь 7.

Ирмос: **Н**е послужиша твари Богомудрии * паче Создавшаго, * но, огненное прещение мужески поправше, * радовахуся, поюще: * препетый отцев Господь и Бог, благословен еси.

Светлый Тя Свет суца, подъят облак Господи, от земли паче ума восприемлема и небеснии собори восхвалиша со апостолы, глаголюще: Боже благословен еси.

Рукама вси радующеся восплецим, Вознесением Христовым, и воскликнем: възыде Бог во гласе трубне, и седе одесную, яко сопрестолен Отцу во веки.

Поя древле Моисей великий, взываше: да поклонятся восходящу Христу небеснии ангели, яко всех Царю, Емуже зовем: отцев Господи и Боже благословен еси.

Богородичен: **О** чудес преславных! Како вместила еси Бога невместимаго богорадованная, плотию обнищавшаго, со славою мноюю в небесная Вознесшагося днесь, и оживившаго человеки?

И минеи на 4.

Katavasia: **В** пещи огненной ...,

Песнь 8.

Ирмос: **О**троки благочестивыя в пещи * Рождество Богородичо спасло есть; * тогда убо образуемое, * ныне же действуемое, * вселенную всю воздвизает пети Тебе: * Господа пойте, дела, * и превозносите Его во вся веки.

Явишася умове апостолом в Вознесении, и вещаху: что взирающе стоите дивящиеся? Сей восходяй в небесная, приидет и паки судити иже на земли человеком, Судия сый Един.

Адим Богу величие, хвалы согласие воскликнем, воспоим, ликуим, руками же воспоем: взыде Бог наш на небеса от земли, ангелом, архангелом поющим Сего, яко Владыку и Творца всех.

Взятся превыше ангел естество наше, древле отпадшее, и на престоле посаждено бысть Божественно, паче смысла: приидите торжествуем и воззовем: Господа пойте дела, и превозносите во вся веки.

Богородичен: Се Сын Твой Богородице, пленив Крестом Своим смерть, воскрес тридневен, и учеником Своим явлься, востече к небесным: с нимиже Тебе покланяющася поем и славословим во вся веки.

И минеи на 4.

Katavasia: Из Отца прежде век ...,

Песнь 9.

Ирмос: Всяк земнородный * да възиграется, Духом просвещаемь, * да торжествует же Безплотных умов естество, * почитающее священное торжество Богоматере, * и да вопиет: * радуйся, Всеблаженная, * Богородице, Чистая Приснодево

О даров паче постижения! О таинства страшнаго! Всеми бо владычествуяй, от земли отходя к небесным, учеником посла Духа Святаго, просветившаго сих смысл, и огненны сотворившаго благодатию.

Полцы ученичестии, Господь рече, вы сидите во Иерусалиме: и Аз низпослю вам Утешителя другаго, Отцу сопрестольна и Мне равночестна, Егоже видите взимаема, и облаком светлым носима.

Взятся яже великолепие выше небес, плотию обнищавшаго, и соседением Отца почтеса естество наше отпадшее: торжествуем, и согласно вси воскликнем, воспоем руками радующася.

Богородичен: Свет от Света возсиявый Всенепорочная, из Тебе возсия, и чернота безбожия всю разруши, и в нощи спящих просвети. Сего ради вси по долгу Тя во веки присно ублажаем.

И минеи на 4.

Katavasia: Тя паче ума ...,

Ексапостиларий самогласен:

Учеником зрящим Тя, вознесся еси Христе ко Отцу соседу, ангели предтекуще зовяху: возмите врата, возмите, Царь бо взыде к начальному Свету славы.

Слава: святаго, аще есть: аще ли ни,

Слава, и ныне: праздника

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 2.

Подобен: Доме Евфрафов:

Слова учеником вернии * совозмемся * добродетели на горы, * яко да Христову славу * видети сподобимся.

Стих: Все языцы восплеците руками, воскликните Богу гласом радования.

Посрамишася яве * манихейская умышления, * умы о нихже * недоумевашуся, Христово яве сказующе * с плотию вознесение.

Стих: Взыде Бог в воскликновении, Господь во гласе трубне.

Воскликни, о Давиде, * радуясь цевницею: * вознесыйся бо * Христос, вещми словеса утверждает * пророчества твоего.

Слава, и ныне, глас 2:

Вознеслся еси во славе на горе Масличней Христе Боже, пред Твоими ученики, и сел еси одесную Отца, всяческая исполняяй Божеством: и послал еси им Духа Святаго, просвещающая и утверждающая, и освящающая души наша.

Таже, Благо есть исповедатися Господеви

Трисвятое. И по Отче наш:

Тропарь праздника, глас 4-й:

Вознеслся еси во славе Христе Боже наш, * радость сотворивый учеником * обетованием Святаго Духа, * извещенным им бывшим благословением, * яко Ты еси Сын Божий, Избавитель мира.

Таже ектения: Помилуй нас Боже: Час 1. И отпуст.

НА ЛИТУРГИИ

Блаженна от канона песнь 5-я, со ирмосом на 6.

Утреннююще вопием Ти Господи, спаси ны: Ты бо еси Бог наш, разве бо Тебе иного не знаем.

Исполнив веселия всяческая Милостиве, к горним силам с плотию пришел еси.

Ангельския силы вземлема Тебе видевшие врата, взываху, Царю нашему, возмите.

Апостоли видевшие возвышаема Спаса, с трепетом взываху Царю нашему: слава Тебе.

Слава: Зрящим апостолом вещаху ангели: мужие галилейстии, что чудитесь Вознесению Жизнодавца Христа: Сей придет паки на землю судити миру всему, яко Судия праведнейший.

И ныне: Богородичен: Деву сохранив Тя по рождестве нетленну, восходит Христос ко Отцу, Богородительнице, Егоже не остави, аще и плоть прият из Тебе, мысленную же и одушевленную, за милость неизреченную.

По входе тропарь праздника, глас 4-й:

Вознеслся еси во славе Христе Боже наш, * радость сотворивый учеником * обетованием Святаго Духа, * извещенным им бывшим благословением, * яко Ты еси Сын Божий, Избавитель мира.

И храма святого: И тропарь святого, аще есть, таже кондак храма. Слава: кондак святого.

И ныне: кондак праздника, глас 6-й:

Еже о нас исполнив смотрение, * и яже на земли соединив Небесным, * Вознеслся еси во славе Христе Боже наш, * никакоже отлучаяся, но пребывая неотступный, * и вопия любящим Тя: * Аз есмь с вами, и никтоже на вы.

Прокимен, глас 7: Вознесися на небеса Боже, и по всей земли слава Твоя.

Стих: Готово сердце мое Боже, готово сердце мое: воспою и пою во славе моей.

Апостол в деяниях, зачало 45: (Деян. 21:8 - 14)

Во дни оны, изшедше Павел и иже с ним, приидохом в Кесарию, и вшедше в дом Филиппа благовестника, суща от седми диаконов, пребыхом у него. Сего же бяху дщери девицы четыре прорицающыя. Пребывающим же нам тамо дни многи, сниде некто от Иудей пророк, именем Агав, и пришед к нам и взяв пояс Павлов, связав же свои руце и нозе, рече: тако глаголет Дух Святый, мужа, егоже

есть пояс сей, тако свяжут его во Иерусалиме Иудее и предадут в руце языков. И якоже слышахом сия, моляхом мы же и наместнии, не восходити ему во Иерусалим. Отвеща же Павел и рече: что творите, плачуще и сокрушающе ми сердце? Аз бо не точию связан быти хочу, но и умерети во Иерусалиме готов есмь за имя Господа Иисуса. Не повинующуся же ему, умолчахом, рекше: воля Господня да будет.

Аллилуиа, глас 2-й: Взыде Бог в воскликновении, Господь во гласе трубне.

Стих: Все языцы восплещите руками, воскликните Богу гласом радования.

Евангелие Иоана, зачало 49 (Ин. 14:27 - 15:7)

Рече Господь Своим учеником: да не смущается сердце ваше, ни устрашает. Слышасте, яко Аз рех вам: иду и прииду к вам. Аще бысте любили Мя, возрадовалися бысте убо, яко рех: иду ко Отцу, яко Отец Мой болий Мене есть. И ныне рех вам, прежде даже не будет, да, егда будет, веру имете. Ктому не много глаголю с вами, грядет бо сего мира князь и во Мне не имать ничесоже. Но да разумеет мир, яко люблю Отца, и якоже заповеда Мне Отец, тако творю, встаните, идем отсюда. Аз есмь лоза истинная, и Отец Мой делатель есть. Всяку розгу о Мне не творящую плода, измет ю, и всяку творящую плод, отребит ю, да множайший плод принесет. Уже вы чисти есте за слово, еже глаголах вам. Будите во Мне, и Аз в вас. Якоже розга не может плода сотворити о себе, аще не будет на лозе, тако и вы, аще во Мне не пребудете. Аз есмь лоза, вы же рождие, и иже будет во Мне, и Аз в нем, той сотворит плод мног, яко без Мене не можете творити ничесоже, аще кто во Мне не пребудет, извержется вон, якоже розга, и изсышет, и собирают ю и во огнь влагают, и сжигает. Аще пребудете во Мне и глаголы Мои в вас пребудут, егоже аще хотите, просите, и будет вам.

За Достойно, поем и до отдания ирмос:

Величай душе моя, Вознесагося от земли на небо, Христа Жизнодавца.

Ирмос: Тя паче ума и словесе Матерь Божию, в лето Безлетнаго неизреченно рождающую вернии единомудренно величаем.

Причастный: Взыде Бог в воскликновении, Господь во гласе трубне.

Аллилуиа [трижды]